

K29

15

:235(1)

29

15
= 235(1)

中國方志叢書·華北地方·第二三五號

據

清·呂懋勛等修袁廷俊等纂
清·光緒元年刊本

影印

陝西 省

藍田縣志

附輞川志及文徵錄

4)

成文出版社有限公司印行

續修藍田縣志序

古者列國皆有史官掌記時事匪直爲書媿惡示褒貶已也人閱人而成世凡其政理謠俗與夫人材之消長物產之盈虛靡不筆之於冊所以成一國之掌故而上繼往昔下開來今也自秦罷封建而置郡縣郡縣之職其專且久不能埒古諸侯又例不得立史官而其撫百里之封膺社稷民人之寄論者謂實與古列國相等則夫後世府縣之有志非卽古者記時事之意乎藍田縣志修於道光十九年新建胡令元煥自時厥後中更

四朝歷年四十可記之事指不勝屈又自同治初元粵逆回匪更迭蹂躪藍邑東西北三鄉罹禍尤酷室廬焚蕩戶口凋殘而一時膺鋒刃赴鼎鑊視死如歸之士女尤多深明大義足彰

國家風教之盛者使不迨今編輯或放軼而無聞或訛舛而不信是誰之過歟余承乏斯土六易暑寒太懼繼往開來之任隳於我躬是用與都人士商權重修適農曹袁君廷俊讀禮家居道合志同慨然身肩其責又復博延才學李孝廉甲王廣文之墳李廣文時雍相與鈎考舊聞網羅

近事焚膏繼晷不踰年而告厥成焉自道光十九年以前
守舊志而遵循之自道光十九年以後續新志而附益之
卷帙次第條例後先一仍其故譬彼承家舊志垂爲典章
而新志奉爲約束者也譬彼行遠舊志導夫先路而新志
步夫後塵者也袁君生長鄉邦諳練故實病夫灞澹各源
舊說輻輳已乃徒步裹糧褰裳披莽由委窮源而正之昔
人云百聞不如一見此尤足信今傳後補前志之未詳也
余不敏幸藉諸賢之力坐使數十年之逸事及身而蒐輯
完備俾後之蒞斯土者展卷瞭然不至有前無可繼之歎

是則余之心亦以少慰也夫遂序而刊之光緒紀元歲在
乙亥夏四月知藍田縣事陽湖呂懋勲謹撰

藍田縣志續修凡例

關中名志有八而武功朝邑爲尤著尊之者直欲擬諸馬班貶之者又力詆其蕪穢皆未免稍過也南宋以來圖經之法久失俗下志乘庸陋蕪雜康韓二君起而矯之叙次雅潔是其所長破壞體例是其所短不得以約省篇卷遂足以俯視一切矣夫州縣方志于古屬外史所掌其在史部也屬地理門圖經者地理門中之一種也方志之例宜以圖經爲主而參用史法俾紀綱法度與凡忠孝節義之行無不燦然畢具爾雅于古潤澤于今圖表志傳四者缺

一不可夫然後可爲信史哉藍田前志重修于乾隆之季
雜而多越今整齊其次俾歸條理先爲發凡以引覽者

藍田志存者有雍正八年之李志嘉慶元年之馬志馬志
中按語多稱舊志卽李志也今志於馬志按語之可存者
存之直稱馬志以別于馬志之稱李志爲舊志

無本之說不可以示後凡所徵引皆標出處或有訛誤後
人得辨而正之

方志以地理爲主地理以圖爲主前志卷首載縣治一圖
略具形似非地理家法也今志仿圖經例以圖冠首別爲

一卷

縣境錯入鄰域參差不齊有長方勾股圭形等勢惟開方之法足以明之故於縣境全圖二十里圖諸山圖道里圖皆用開方水勢曲折歷澗而注非開方所能盡故諸水圖不用

建置作圖者三輔黃圖洛陽宮殿圖例也縣署爲出治之所學宮書院爲敷教之地三者之外餘皆不圖

圖必有注昉於大易之繫辭也鄭樵謂辭以繫名蓋繫於易象之後卽圖注之所由起春秋公羊家言比事屬詞屬

詞亦繁辭之義春秋無圖而有譜太史公書歷引周譜譜
與圖名異實同故屬詞卽周譜之圖注也三輔黃圖遁甲
開山圖諸書久亡其散見於唐宋人所引者皆當日之圖
注故今志圖後之注雖創實因

藍田爲秦楚咽喉自古戎馬所必經之地營汎驛舖在所
必詳今於縣境全圖內列清而注中更明之

前志首載天文循俗例也並引填星掩鉞熒惑入東井二
事以爲藍田徵應似矣然占法統言在秦不言在藍田因
桓溫破符健沈田子破姚泓皆在藍田遂謂二星專主

田可乎今一概從刪特作地平高弧表以明授時之準
前志沿革紀事分二門雜記中又散著大事非例也今以
年經月緯之法合爲一表庶覽者犁然

職官選舉前志但錄履歷非傳非表大類花名卯冊茲特
更正其有事可紀者入循吏列傳無事者入表以存其名
山川有圖復入土地志者縣境山川皆有名于古見於史
與各地理家書圖只能辨方位不能溯古蹟也土人所呼
之名於古不合志中叙次一主俗名而以古名證注其下
蓋流俗沿訛不自今始專列古名反滋疑怪矣

秦嶺大幹自西而東餘脉散爲諸原自南而北縣境水皆北流羣山夾之而趨所謂兩山之間必有川也觀川勢卽知山脉雖當圖注亦可

古蹟風土等自來志乘皆各自爲門今皆統諸土地志以省繁冗

輞川名勝最多今以前歲已作輞川專志將附諸縣志後故今志古蹟等但列其名而不詳叙以免重複

功令賦役全書十年一修因革損益不盡與舊同也道光十九年賦役全書初成故志田賦全采之不厭其詳

學宮書院皆有圖復作學校志者造士之方圖難盡載彙
爲一志以昭鄭重

古者學與廟分有事則祀先聖先師於學而已元明以來
學與廟合至今已成定制呂涇野志高陵喬三石志耀入
文廟於祠祀不入於學校意在存古不自知其違今也今
志於文廟有學宮圖卽以建置爲圖注而學校志但載規
制庶于古今兩不戾

寺觀本宜入土地志今以類相從附祠祀後

藝文金石前志所無不憚搜羅以補其闕

重刊集三
前志于各傳分門太多且有毫無寔事而以雷同之言類
乎考語亦爲一傳者皆不合例今使各以類附不入傳亦
不沒其名

前志以蘇晉榮察入藝苑傳非也今改入列傳韓幹施璚
兩人占藝苑一門不成篇目故亦入列傳

前志方伎只趙胡一人不成篇目亦無可從之類而雜記
中所載有名僧道甚多不人正志亦非例也考前史如佛
圖澄鳩摩羅什元奘張果林靈素之流皆入方伎傳較魏
書之釋老志元史之釋老傳尤爲得體今志遂從此例

節孝婦已蒙旌表者全入列女傳其未旌而已合例者近人修咸甯長安二志皆備載之窮鄉僻壤苦節能甘無力上達遂致湮沒是採訪者之責也俟核其真確以次續入

前志徵引甚博凡涉縣事雖稗官野語無不羅載今一一刊正以明史例特成書甚速不無罅漏大雅君子匡其不逮幸甚幸甚

續修藍田縣志職官名氏

總纂

陝西卽補同知直隸州西安府藍田縣知縣

呂懋勳

江蘇陽湖人

編輯

藍田縣儒學教諭

張廷鑑

岐山人貢生

藍田縣儒學訓導

張鈞

石泉人舉人

參訂

藍田縣典史

張裕本

河南陝州人

監刊

藍田縣城守營汛把總

袁守安 西安人

校正

內閣中書

呂懋采 江蘇陽湖人舉人

校修

內閣中書

呂申 臨潼人拔貢

總修

戶部主事

袁廷俊 邑進士

總校

前神木縣教諭

李甲 邑舉人